

唐人說薈

濟蒼題籤



唐人說本

齊魯書院藏
明

劇談錄

唐康駢輯

會昌中北都晉陽令狄惟謙仁傑之後守官清恪不畏強禦屬邑境亢陽自春徂夏數百里田皆耗斲禱於晉祠畧無其應時有郭天師暨并州女巫巫少攻符術多行厭勝監軍使携至京國因緣中貴出入官掖遂賜天師號旋歸本土僉曰若得天師一至晉祠則不足憂矣惟謙請於天師初甚難之既而敦請主帥遂親往迂焉巫者唯唯乃具車輿列幡蓋惟謙躬為控馬既至祠所盛具供帳罄折庭中翌日語惟謙曰我為爾飛符上界請雨已奉天帝命必在至誠三日雨當足矣繇是四郊士庶雲集期滿無徵又曰災軫所興良由縣令無德我為爾再告天七日方合有雨惟謙引罪奉之愈謹竟無其效乃驟欲入州復拜留曰天師已為萬姓來更乞至心祈請悖然而詈曰庸瑣官人不知天道天時未肯下雨留我將復奚為乃謝曰非敢更煩天師俟明相餞耳於是宿戒左右我為巫者所辱豈可復言為官耶詰旦有所指揮汝等咸須相稟是非好惡予自當之迨曉時門未開郭已嚴飾歸騎而狄酒般供設一無所施郭乃坐堂中大恣訶責惟謙遂曰左道女巫妖惑日久當須斃在此日焉敢言歸叱左右於神前鞭背二十投於灤水祠有山高可十丈遽命設席焚香從吏悉皆

放還簪笏立其上。於是闔城駭愕。云邑長杖殺天師。馳走紛紜。觀者如堵。時砂石流
爍。忽起片雲。大如車蓋。先覆惟謙立所。四郊雲物會之。雷震數聲。甘雨大澍。原野無
不滂流。土廣數千。自山擁惟謙而下。州將以殺巫者。初亦怒之。既而精誠感應。深加
嘆異。表列其事。詔書褒異。云惟謙劇邑良才。忠臣華胄。觀茲天厲。將殫下民。當請禱
於晉祠。類投巫於鄴縣。曝山椒之畏景。事等焚軀。起天際之油雲。情同剪爪。遂使旱
風潛息。甘澤旋流。昊天猶鑒克誠。予意豈忘褒善。特頒朱綬。俾耀銅章。勿替令名。更
宣殊績。乃賜錢五十萬。

元積鎮江夏。襄州賈墅有別業。構堂架梁。纔畢。疾風甚雨。時戶各輸油六七甕。忽震
一聲。甕悉列於梁上。都無滴汗於外。是年積卒。

大中歲。韋顥舉進士。詞學贍而貧。囊滋甚。歲暮飢寒。無以自給。有韋光者。待以宗黨。
輟所居外舍。館之。放榜之夕。風雪凝沍。報光成事者。絡繹而至。顥暑無登第之耗。光
延之於堂際下閣。備設酒饌。慰安。見女僕料數衣裝。僕者排比車馬。顥夜分歸所止。
擁爐愁嘆而坐。候光成名。將進修賀禮。顥坐逼於壞牖。以橫竹掛席蔽之。簷際忽有
鳴鳧。頃之集於竹上。顥神魂驚駭。持策出戶逐之。飛起復還。久而方去。乃謂諸候者
曰。我失意亦無所恨。妖禽作怪如此。兼恐橫罹禍患。俄而禁鼓忽鳴。榜放。顥已登第。

光服用車馬悉將遺焉

鳳翔少尹王鮪禮部侍郎凝之叔父也。年十四五與童兒輩戲於果園竹林下。見二枯首為蠹壤所沒。乃令小僕擇淨地瘞之。祭以酒饌。其後數夕陰晦。忽聞窗外悉窣有聲。良久問之。云某等受君深恩。免在蕪穢。未知所酬。聊願驅策爾。後凡有吉凶。盼嚮聞必來報。如此數年。遂與靈物通徹。崔珙為度支使。雅知於鮪。一夕留飲。家釀酒酣。稍歡。云有妓善歌者。令召之。良久不至。珙自入視之。云理裝纔罷。忽病心痛。請飲湯而出。珙復坐。鮪具言歌者儀貌。珙怪問之。云適見一人着短綾緋衣。控馬而去。語未畢。家僕報中惡。救不返矣。珙甚悲之。鮪密言有一事。或可活之。須得白牛頭及酒一斛。因召左右試令求覓。有度支所用甚幹事。以善價取之。不踰時而至。鮪令扶歌者置於淨室榻上。前以大盆盛酒。橫取板安牛頭於其上。設席焚香。密封其戶。且誠曰。專伺之。曉鼓一動。聞牛吼當急開戶。可以活矣。鮪遂去。禁鼓忽鳴。果聞牛吼。開戶視之。歌者微喘。盆酒悉乾。牛怒目出於外。數日方能言。云其夕治裝既畢。有人促召出門。乘馬而行。約數里。見室宇華麗。張樂四座。皆朱紫少年。見歌者至大喜。致於妓席。歡笑方洽。忽聞有人大呼。聲振庭廡。座者失色相視。妓樂俱罷。俄見牛頭人長丈餘。執戟徑趨而出。無不狼狽而走。惟歌者在焉。牛頭引於階前。背負而出。行十數步。

忽覺臥於室內。珙後密詢其事。鮪終不言。

乾符中有李使君出牧罷歸。居在洛陽。深感一貴家舊恩。欲召諸子從容有敬愛寺僧聖剛者。常所往來。李因以其宴為說。僧曰。某與為門徒久矣。每觀其食。窮極水陸滋味。當饌必以炭炊。往往不愜其意。此乃驕逸成性。使君召之可乎。李曰。若朱象巖。白猩猩。忍未必能致。止於精辦小筵。亦未為難。於是廣求珍異。俾妻奴親為調鼎。備陳綺席。雕盤。選日邀致弟兄列坐。矜嚴若冰玉。餚羞每至。曾不入口。主人揖之再三。唯沾果實而已。及至冰餐。但置一匙于口。各相眄良久。咸若啗藥吞針。李莫究其由。但以失飪為謝。明日復見聖剛。備述諸子情貌。僧曰。前者所說。豈謬哉。既而造其門問之。曰。李使君特備一筵。諸饌可謂豐潔。何不畧領其意。諸子曰。燔炙煎和未得法。僧曰。他物縱不可食。炭炊之餐。又嫌何事。乃曰。上人未知。凡以炭炊饌。先煖令熟。謂之煉炭。方可入爨。不然。猶有烟氣。李使君宅炭不經煉。是以難食。僧拊掌大笑曰。此則非貧道所知也。及巢寇陷洛。財產剽掠俱盡。昆季數人乃與聖剛同竄。潛伏山谷。不食者至于三日。賊鋒稍遠。徒步將往河橋道中。小店始開。以脫粟為餐而膏。僧囊有錢數百。買于土杯同食。腹枵既甚。膏梁之美。不如僧笑而謂之曰。此非煉炭所煖。不知堪與。即君吃否。皆俯頭慚醜。無詞以對。

開成中有龍復本者無目善聽聲揣骨每言休咎無不中凡有象簡竹筭以手捻之必知官祿年壽宋祈補闕有盛名於世縉紳之士無不傾屬屈指翹足期於貴達時永樂蕭相真亦居諫署同日詣之授以所持竹筭復本執蕭公良久置于案上曰宰相筭次至宋補闕者曰長官筭宋聞之不樂蕭曰無憑之言安足介意經月餘同列於中書候見宰相時李朱崖方秉鈞軸威鎮朝野未見間佇立閒談互有諧謔頃之丞相遽出宋以手板障面笑未已朱崖目之迴顧左右曰宋補闕笑某何事聞之者莫不心寒股慄未旬日出為清河縣令歲餘遂終所任其後蕭公履歷清途自浙西觀察使入判戶部非久遂居廊廟俱如復本之言

張侍郎某為河陽為重裔從事同幕皆是名輩有道流殷九霞來自青城山有知人之鑒為公問己年壽官祿九霞曰司徒貴任藩服所望者秉持鈞軸封建茅土唯在保守庸勲苞貯仁義享福隆厚殊不可涯既而遍問賔僚九霞曰其間必有台輔時為公重一裴副使應聲曰裴中丞是宰相否九霞曰若以目前人事言之當如尊旨以某所觀即不在此時夏侯相攷為館驛巡官且形質低粹為因戲曰莫是夏侯巡官對曰司徒所言是矣為公撫掌而笑曰尊師莫錯否九霞曰某山野之人早修直道無意于名宦金玉蓋以所見任真而道耳為公曰如此則非某所知也然其次貴

達者為誰。曰張支使。雖不居廊廟。履歷清途。亦至榮顯。既出遂造張侍郎所居。從容謂曰。支使神骨清爽。氣韻高妙。若以綬冕累身。止於三二十年。居於世俗。倘能擺脫囂俗。相隨學道。即二十年內。白日上昇。某之此行。非有塵慮。寔亦尋訪修真之士耳。然閱人甚多。無如支使者。張以其言意浮濶。但唯唯然。將去復來。情甚懇至。審知張意不迴。頗甚嗟惜。因留藥數粒。并黃紙書一緘。而別云。藥服之可以無疾。書紀宦途所得。每一遷轉。密自啟之。書窮之辰。當自相憶。其後譙公顯赫令名。再居台鉉。張果踐朝列。出入臺省。佩服朱紫。廉察數州。書載之言。靡不詳悉。年及三紀。時為戶部侍郎。紙之所存。蓋亦無幾。雖名位通顯。而齒髮衰退。每以道流之事。話于親知。追想其風。莫能及也。

處士丁重善相人。駙馬于宗方判鹽鐵。頗有宰弼之耗。時路巖秉鈞持權。與之不協。一日重至新昌私第。值于公適至。路曰。某與之賓朋。處士垂箔細看。此人終作宰相否。備陳飲饌。留連數刻。既去。問之曰。所見何如。重曰。入相必矣。兼在旬月之內。巖笑曰。見是貴戚。復作鹽鐵使耳。重曰。不然。請問于之恩澤。何如。宣宗朝鄭都尉。岩曰。又安可比乎。重曰。鄭為宣宗注意者。久而竟不相。豈將人事可以斟酌。某比不熟識於侍郎。今日見之。觀其骨狀。真為貴人。其次風儀修整。禮貌謙抑。如百斛重器。所貯尚

空其半。安使不益於祿位哉。苟踰月不居廊廟。某無復更至門下。嚴曰處士之言可謂遠矣。其後決旬于東登台鉉。嚴每見朝賢大為稱賞。由茲聲動京邑。車馬盈門。凡有所說。其言皆驗。後居終南山。好事者亦至其所。

侍中王智興初為徐州節度使。武畧英特。有命世之譽。幕府既開。所辟皆是名士。一旦從事於使院會飲。與賓朋賦詩。項之達於王。王乃召護軍俱至。從事因屏去翰墨。但以杯盤迎接。良久問曰。適間判官與諸賢作詩。何得見某而罷。遽令却取筆硯。以彩箋數幅陳席上。眾賓相與持疑。俟行觴舉樂。復曰。本來欲觀製作。非以飲酒為意。時小吏亦以牋翰置于王公之前。從事禮為揖讓。王曰。某韜鈴發跡。未嘗留心章句。今日陪奉英髦。不免亦陳愚懇。於是引紙援毫。頃刻而就。云。三十年來老健兒。剛被郎官遣作詩。江南花柳從君詠。塞北烟塵我自知。四座覽之驚嘆無已。時文人張枯亦與此筵。監軍謂之曰。觀茲盛事。豈得無言。枯即席以詩為獻。云。十年受命鎮方隅。孝節忠規兩有餘。誰信將軍嘉政外。李陵章句右軍書。智興覽之笑曰。褒飾之詞。可謂過當矣。左右或言曰。書生之徒。務為諂佞。智興叱之曰。有人道我惡。汝輩又肯否。張秀才海內名士。豈云易得。天下人聞且以為王智興樂善矣。駐留數旬。臨岐贈絹千疋。

京國豪士潘將軍。住光德坊。忘其名。眾為潘鵲碑也。本家襄漢間。常乘舟射利。因泊舟江壚。有僧乞食。留止累日。盡心檀施。僧歸去。謂潘曰。觀爾形質氣度。與眾貴不同。至於妻孥。皆享厚福。以為王念珠一串。留贈之。寶之。不但通財。他俊亦有官祿。既而遷貿數年。遂鏹均鄭陶。其後職居左廣。列第於京師。嘗寶念珠。貯之以繡囊。合置道場內。每月朔則出而拜之。一旦開合。啟囊已亡珠矣。然而緘封若舊。他物亦無所失。於是奪魄喪精。以為其家將破之兆。有主藏者。嘗識京兆府停解所。由王超。年且八十。因密話其事。超曰。異哉。此非攘竊之盜也。某試為尋之。未知果得否。超他日曾過勝業坊北。時春雨初霽。有三鬟女子。年可十七八。衣裝藍縷。穿木屐。於道側槐樹下。值軍中少年蹴鞠。接而送之。直高數丈。於是觀者漸眾。超獨異之。為尋其所止。於勝業坊北門短曲。有母同居。蓋以針紉為業。超時因以他事熟之。遂為甥舅。居室甚貧。與母同臥土榻。煙爨不動者。往往經於累日。或設殷羞。時有水陸珍異。吳中初進洞庭橘。恩賜宰臣外。京輦未有此物。密以一枚贈超。云有人於內中將出。而稟性剛決。超異甚疑之。如此往來周歲矣。超一日携酒食與之。從容徐謂曰。舅有深識。欲告外甥。未知何如。因曰。每感重恩。恨無所答。若力可施。必能赴蹈湯火。超曰。潘將軍失却念珠。不知知否。微笑曰。從何知之。超揣其意。不甚藏密。又曰。外甥忽見尋覓。厚備繒

絲售贈女子曰。勿言於人。某偶遇朋儕為戲。終却送還。因循未暇。舅來日詰旦於慈恩寺塔院相候。某知有人寄珠在此。超如期而往。頃刻至矣。時寺門始開。塔戶猶鎖。謂超曰。少頃仰觀塔上。當有所見。語訖而走。疾若飛鳥。忽於相輪上舉手示超。歛然携念珠而下。曰。便可將還。勿以財帛為意。超送詣潘。具述其旨。因以金玉繒帛密為之贈。明日訪之。已空室矣。

咸通九年春。華陰縣南十里餘。一夕風雷暴作。有龍移湫自遠而至。先其崖岸高無貯水之處。此夕陡開數十丈。水由東西直南北。峯巒草樹一無傷。碧波迴塘。湛若䟽鑿。京洛行旅。無不枉道就觀。有好事者。自輦轂蒲津相率而至。車馬不絕。音逮於累日。京城南靈應有三娘湫。與炭谷相近。水波澄明。莫測深淺。每秋風搖落。常有草木之葉飄於其上。雖片葉纖芥。必飛禽銜而去。禱祈者多致花鈿錦綺之類。啟視投之。歛然而沒。乾符初。有朝士數人同遊於終南山。遂及湫所。因話靈應事。其間不信者。試以木石投之。尋有巨魚躍出波心。鱗甲如雪。俄而風雨晦暝。車馬幾為暴水所漂。爾後人愈敬服。莫敢犯者。

長安安業唐昌觀。舊有玉蕊花。其花每發。若瓊林瑤樹。唐元和中。春物方盛。車馬尋玩者相繼。忽一日有女子。年可十七八。衣綠綉衣。垂雙髻。無簪珥之飾。容色婉婉。迥

出於眾。從以二女冠。二小僕。皆州髻黃衫。端麗無比。既而下馬。以白角扇障面。而直造花所。香異芬馥。聞於數十步外。觀者疑出自宮掖。莫敢逼而視之。佇立良久。命女僕取花數枝而去。將乘馬。顧謂黃衫者曰。曩有玉峯之期。自此行矣。時觀者如堵。咸覺烟飛鶴唳。景物煇燠。舉轡有餘步。有輕風擁塵。隨之而去。須臾塵滅。望之已在半空。方悟神仙之遊。餘香不散者經月。時嚴休復。元稹。劉禹錫。白居易。俱作玉藥院真人降詩。嚴休復曰。終日齋心禱玉宸。魂銷眼冷未逢真。不如一樹瓊瑤藥。笑對藏花洞裏人。又曰。香車漸下玉龜山。塵世何由睹薜蘿。惟有無情枝上雪。好風吹綴綠雲鬟。元稹詩曰。弄玉潛過玉樹時。不教青鳥出花枝。的應未有諸人覺。只是嚴郎自得知。劉禹錫詩曰。玉女來看玉樹花。異香先引七香車。攀枝弄雪時迴首。驚怪人間日易斜。又曰。雪藥瓊葩滿院春。羽林輕步不生塵。君王簾下徒相問。長伴吹簫別有人。白居易詩云。羸女偷乘鳳下時。洞中暫歇弄瓊枝。不緣啼鳥春饒去。青瑣仙郎可得知。時人稱頌之。

中書令晉公裴度。微時羈寓洛中。常乘蹇驢入皇城。方上天津橋。時淮西不庭。已數年矣。有二老人倚橋柱而立。語云。蔡州用兵日久。徵發甚困於人。未知何時平定。忽睹度驚愕而退。有僕者携囊後行。相去稍遠。聞老人云。適憂蔡州未平。須待此人為

將既歸僕者具述其事。度曰見我龍鍾相戲耳。其秋果領鄉薦。明年及第。泊秉鈞衡。朝廷議授吳元濟節鉞。既而延英候對。憲宗問宰臣。度奏曰。賊臣跋扈四十餘年。聖朝姑息含宏。蓋慮凋傷一境。不聞歸心。效順乃欲坐據一方。若以旄鉞授之。翻恐恣其凶迷。以陛下聰明神武。藩鎮皆願勤王。臣請一詔進兵。可以蕩平妖孽。于是命度為淮西節度使。興師致討。時許滑三帥先於鄆城縣屯軍。度統精甲五萬會之。受律鼓行而進。直造蔡州城下。纔兩月。擒賊以獻。淮西遂平。後入朝居廊廟。大拜正司徒。為侍中。中書令。儒生武德。振耀古今。泊留守洛師。每話天津橋老人之事。出征淮西。請韓愈自中書舍人為掌書記。及賊平。朝覲樂和。李僕射方為華州刺史。戎服褰韉。迎于道左。愈有詩云。荆山行盡華山來。日照潼關四扇開。刺史莫嫌迎候遠。相公親破蔡州回。

河南府伊闕縣前大溪。每潦佐有入臺者。即水中先有小灘漲出。石礫金沙澄澈可愛。丞相牛僧孺為縣尉。一旦忽報灘出。翌日邑宰與同僚列筵于亭上觀之。因召耆宿備詢其事。有老吏云。此必分司御史。非西臺之命。若是西臺。灘上當有鸛鵲雙立。前後邑人以此為驗。僧孺潛揣縣僚無出于己。因舉杯曰。既有灘。何惜一雙鸛鵲。宴未終。俄有鸛鵲飛下。不旬日。拜西臺監察。

咸通中有五經博士盧肇得神仙補養之道自言生于隋代宿舊朝士皆云童幼時見奕世奉之不窮其壽安史之亂隱於終南山中其後或出或處令狐綯喻以柱下漆園之事稍從宦于京師常言與處士劉平善天寶中居與齊魯尤善吐納之術能夜中視物不假燈燭安祿山在范陽厚幣致于門下平見祿山左右常有鬼物數十殊形詭狀持爐執蓋以為道從平心異之謂祿山必為人傑及祿山朝覲與平俱至華陰縣值華法善投龍西嶽平旋見二青衣童子乘虛而至所見祿山鬼物皆棄爐投蓋狼狽而走因知祿山為邪物所輔必不以正道克終及祿山歸范陽遂逃入華山而隱

中令白敏中方居郎署未有知者唯朱崖相李德裕特以國器重之於是縉紳間多所延譽然而資用不充無以祇奉僚友一旦相國遺錢十萬俾為酒肴之備約省閣名士數人尅日同過其第時秋暮沉陰涉旬霖漉賀跋任員外府罷求官未遂將欲出薄遊與白公同年登第載車就門告别聞者以俟朝客乃以他去對之賀跋駐車留書備述羈遊之意白覽書曰丈夫處窮達當有時命苟不才者以僥倖取容未足為發身之道豈得家蓄飲饌止邀當路豪貴曩時登第貧交今日閉門不接縱使便居榮顯又安得不愧于懷遽令僕者邀賁跋回車遂以杯盤同享俄而所約朝客聯

騎而至。聞者具陳與賀跋從容。無不愧愕而去。翌日於私第謁見相國。詢朝士來者為誰。白公對以賓客未至。適有同年出京訪別。憫其龍鍾委困。不忍棄之。留飲數杯。遂闕祇接。既負吹噓之意。甘從譴斥之罪。相國稱嘆逾時。云此事真古人之道。由茲貴達。可以激勸澆薄。不旬日。賀跋自使下評事。先授美官。白公以庫部郎中入為翰林學士。未踰三載。便秉鈞衡。其後五鎮藩方。再居廊廟。蹈義懷仁。始終一致。流芳傳素士林。美之大。初中邊鄙不寧。吐蕃尤恣崛強。宣宗皇帝決于致討。延英先問宰臣。公首奏興師。遂為統帥。率沿邊鎮藩兵數十萬。鼓行而前。時大戎列陣于川。以生騎馬數千匹。伏藏山谷。既而得于謀者。遂設奇兵待之。有蕃酋帥衣緋茸裘。繫寶裝帶。所乘白馬駿異無比。鋒鏑未交。揚鞭出于陣前者數四。頻召漢軍。閭將白公誠兵士無得而應之。俄而駐軍指揮。背我師百餘步而立。有潞州小將驍勇善射。馳馬彎弧而出。連發兩箭。皆中項。躍馬而前。抽短劍踏於鞍上。以手扶拔。如鬪毆之狀。蕃軍但呼噪助之。於鞍脫緋裘。解金帶。奪馬而還。師旋無不奮勇。既而大戰沙漠。虜陣瓦解。乘勝追奔。幾及黑山之下。所獲駝馬輜重不可勝計。束手而降。三四萬人。先是河湟郡界在白奴者。自此悉為唐土。宣宗初覽捷書云。我知敏中必殄兇醜。白公凱旋與同列宰相進詩曰。一詔皇城四海頌。醜戎無數束身還。成樓吹笛人休戰。牧野

嘶風馬自閒。河水九盤收數曲。龍山千里鎖諸關。西邊北塞今無事。為報東南夷與蠻。馬相植詩云。舜德堯仁化犬戎。許提河隴致皇風。指揮文武恃神策。恢拓乾坤是聖功。四帥有征無汗馬。七關雖戍已殲戎。天留此事還真主。不在他年在大中。魏相扶詩云。蕭關新復舊山川。古戍秦原景象鮮。戎虜乞降歸惠化。皇威漸被攝腥羶。穹廬遠戍烟塵滅。神武光揚竹帛傳。左衽盡知歌帝澤。從茲不更備三邊。崔相鉉詩云。邊陲萬里注恩波。宇宙群方洽凱歌。有地名王爭解辦。達方戎壘盡投戈。烟塵永息三秋戍。瑞氣遙清九折河。共偶聖明千載運。更觀俗阜與時和。

元和中進士李賀。善為歌篇。韓愈深所知重。於縉紳間。每為延譽。由此聲華藉甚。時元稹年少。以明經擢第一。攻篇什。常交結于賀。一日執贄造門。賀覽刺不容遽入。僕者謂曰。明經及第。何事來看李賀。稹無復致情。慙憤而退。其後自左拾遺制策登科。日當要路。及為禮部郎中。因議賀祖諱晉。不合應舉。賀亦以輕薄為時輩所排。遂致輒軻。韓愈惜其才。為著諱辨錄明之。然竟不成名。

馬援好騎。善別名馬。於交趾得駱越銅鼓。乃鑄為馬式。表曰。臣當師事子阿。受相馬骨法。善相馬者。東門京鑄作銅馬法獻之。有詔立馬於魯班門外。則更名魯班門曰金馬門。臣謹依儀氏韉中帛氏口齒。謝氏唇鬚。丁氏身中。借此數家骨相。以為法。馬

高三尺五寸。有詔置于宣德殿下。以為名馬式。馬援銅馬相法曰。水火欲分明。水火在鼻兩孔間也。上唇欲急而方。口中欲火而有光。此馬千里。頷下欲深。下唇欲緩。牙欲向前。牙欲去齒一寸。則四百里。牙劍鋒則千里。目欲滿而澤。腹欲充。膝欲小。季肋欲長而膝欲起。肘腋欲開。膝欲方。蹄欲厚三寸。堅如石。劉仕義曰。武事尚強。而馬之用為急。則援用之法不可不知也。雖然有說焉。相其形尤當相其神者。伯樂使九方臯求天下馬。得之沙邱。反報曰。牝而黃。使人往取之。牡而驪。或以讓樂。樂曰。否。臯所觀天機也。所謂天機。其神之謂乎。故曰。世上豈無千里馬。人中難得九方臯。通於此說者。可以盡相法矣。是又不可不知也。

昔郭鄴罷欒陽尉。窮居京輦。盼嚮間常有二物。狀如猿猴。出入無不相逐。所造之聞如碍棘棘。病於寒餒者數年。百計莫之能絕。一夕愁坐。忽來告別云。某久乘君危。渾渾不相離。今將詣勝業坊王氏。散其金帛。郭究問其事云。先得安品子。郭言于表弟張生。未甚信。王素吝嗇。一日與賓從同過鳴珂里。見婦人靚粧倚門悅之。遂召同列命酒為歡。時張生預其末。頗以為異。密問之。則安品子也。品子善歌。王氏悉以金帛贈之。自是資貨日輸其門。每歡洽酒酣。略無所吝。未經數年。遂至貧困。